



Cuira, ils 13 d'october 2022

Communicaziun a las medias

## Midada en la direcziun operativa da la Lia Rumantscha

**Dapi il matg 2021 è Diego Deplazes il secretari general da la Lia Rumantscha. A partir dal 1. d'avrigl 2023 s'engascha el sco mainafatschenta da la Crusch Cotschna Svizra dal chantun Grischun. L'entira suprastanza sut il presidi dad Urezza Famos e Gianna Luzio engrazian a Diego Deplazes per ses grond sustegn e la buna collavuraziun.**

Per la fin da favrer 2023 sa retira Diego Deplazes sco secretari general da la Lia Rumantscha. La raschun per sia demissiun è sia elecziun sco mainafatschenta da la Crusch Cotschna Svizra dal chantun Grischun. Sia nova sfida professiunala cumenza l'avrigl 2023. Suenter bunamain dus onns sin il sector da la lingua e cultura al maina sia via professiunala enavos sin il sector social e da la sanadad. Diego Deplazes davart sia decisiun: «Sco mainafatschenta da la Crusch Cotschna Svizra dal chantun Grischun hai jau la pussaivladad da m'engaschar sin il sector social e da la sanadad e far diever da mias enconuschientschas professiunalas.»

La suprastanza sut il presidi dad Urezza Famos e Gianna Luzio deplorescha la decisiun da Diego Deplazes ed engrazia ad el per ses engaschament e la buna collavuraziun. «Il rinforzament da las structuradas operativas, instradà da Diego Deplazes, è ina basa preziosa per sviluppar vinavant la Lia Rumantscha», affirmeschan las duas co-presidentas. La suprastanza giavischa a Diego Deplazes gia uss bler success per sia nova sfida professiunala.

En il temp d'uffizi da Diego Deplazes crodan impurtantas decisiuns strategicas per l'avegnir da la Lia Rumantscha. Uschia han las delegadas ed ils delegads approvà l'october 2021 ina nova strategia, elegì in nov co-presidi e renovà la suprastanza. Novs accents metta la strategia oravant tut cun l'utilisaziun dals avantatgs da la transformaziun digitala, il svilup da novas purschidas da furmaziun e la promoziun dal rumantsch ordaifer il territori linguistic tradiziunal. Per l'ulteriura realisaziun da questa strategia vegn la piazza vacanta en la direcziun operativa da la Lia Rumantscha publicada da nov da la suprastanza.

### Contact per las medias:

Urezza Famos, co-presidenta Lia Rumantscha, presidenza@rumantsch.ch, 079 610 48 04

Gianna Luzio, co-presidenta Lia Rumantscha, presidenza@rumantsch.ch, 079 662 85 62

Diego Deplazes, secretari general Lia Rumantscha, diego.deplazes@rumantsch.ch, 081 258 32 22